



Eich cyf/Your ref P-06-1359  
Ein cyf/Our ref MA/JMSS/00536/23

Jack Sargeant AS  
Cadeirydd - y Pwyllgor Deisebau  
Senedd Cymru  
Bae Caerdydd  
Caerdydd  
CF99 1SN

20 Medi 2023

Annwyl Jack,

Diolch am eich gohebiaeth dyddiedig 22 Awst, yn glŷn â'r ddeiseb gan Jade Richards yn gofyn i Lywodraeth Cymru ehangu'r cymorth gofal plant yng Nghymru i gyd-fynd â'r cynigion a gyhoeddodd y Canghellor ar gyfer Lloegr yng Nghyllideb y Gwanwyn.

Rwy'n cydnabod bod darpariaeth o ansawdd uchel yn y blynyddoedd cynnar yn allweddol bwysig wrth sicrhau bod pob plentyn yn cael profiad gwych yn ystod plentyndod, yn cael y dechrau gorau mewn bywyd ac yn cyflawni ei botensial.

Rydych yn ymwybodol, ein bod eisoes, drwy'r Rhaglen Lywodraethu ddiwygiedig, wedi ymrwymo i ehangu gofal plant a ariennir i blant dwy oed, ac mae hyn yn cael ei wneud drwy ein rhaglen Dechrau'n Deg. Mae'r rhaglen Dechrau'n Deg yn gwneud gwahaniaeth gwirioneddol i fywydau plant sy'n byw yn rhai o'n cymunedau mwyaf difreintiedig yng Nghymru. Dengys tystiolaeth werthuso annibynnol bod Dechrau'n Deg yn cael effaith gadarnhaol ar fywydau teuluoedd ac wedi newid bywydau rhai o'r teuluoedd a oedd angen y cymorth fwyaf. Mae'r rhieni hyn wedi datgan bod Dechrau'n Deg wedi cael effaith gadarnhaol ar ddatblygiad eu plentyn a'i fod wedi gwneud cyfraniad cadarnhaol i'w sgiliau a'u gwybodaeth nhw fel rhiant hefyd.

Mae darparu gofal plant rhan-amser o ansawdd uchel a ariennir ar gyfer plant 2-3 oed yn rhan annatod o Dechrau'n Deg. Dyna pam ein bod wedi dewis canolbwyntio ar ehangu'r ddarpariaeth drwy'r rhaglen Dechrau'n Deg yn hytrach na thrwy Gynnig Gofal Plant Cymru.

Mae'r Cynnig Gofal Plant ar gael i deuluoedd cymwys plant 3 i 4 oed ac mae'n darparu cymorth am 48 wythnos y flwyddyn, o'i gymharu â'r cynnig o 38 wythnos yn Lloegr. Er bod hyn yn cynnwys o leiaf 10 awr ar gyfer addysg gynnar yn ystod y tymor, mae gofal plant o 30 awr ar gael bob wythnos am 9 o'r wythnosau gwyliau.

Canolfan Cyswllt Cyntaf / First Point of Contact Centre:  
0300 0604400

Bae Caerdydd • Cardiff Bay  
Caerdydd • Cardiff  
CF99 1SN

[Gohebiaeth.Julie.Morgan@llyw.cymru](mailto:Gohebiaeth.Julie.Morgan@llyw.cymru)  
[Correspondence.Julie.Morgan@gov.wales](mailto:Correspondence.Julie.Morgan@gov.wales)

Rydym yn croesawu derbyn gohebiaeth yn y Gymraeg. Byddwn yn ateb gohebiaeth Gymraeg sy'n dod i law yn Gymraeg ac ni fydd gohebu yn Gymraeg yn arwain at oedi.

Rydym yn croesawu derbyn gohebiaeth yn Gymraeg. Byddwn yn ateb gohebiaeth a dderbynnir yn Gymraeg yn Gymraeg ac ni fydd gohebu yn Gymraeg yn arwain at oedi.

Ym mis Medi 2022, ehangwyd y meini prawf cymhwysra yng Nghymru i gynnwys rhieni mewn addysg a hyfforddiant. Cefnogodd y newid hwn dros 500 o deuluoedd ychwanegol yn ei flwyddyn gyntaf ac mae'n dangos ein bod yn rhoi cryn bwyslais ar gefnogi'r rhai sy'n ceisio gwella'u statws cyflogaeth trwy ennill cymwysterau, ailhyfforddi neu newid llwybrau gyrfa.


Fel rhan o Gyllideb y Gwanwyn cyhoeddodd y Canghellor fod Cymru yn cael £178m yn ychwanegol dros y ddwy flynedd nesaf (2023-24 a 2024-25) o ganlyniad i'r holl benderfyniadau gwariant a wnaed yn Lloegr, nid yn unig i ehangu gofal plant a ariennir. Roedd hyn yn golygu bod ein sefyllfa ariannol hyd at £900m yn is mewn termau real na'r hyn yr oeddem yn ei ddisgwyl - a'r hyn y dywedodd Llywodraeth y Deyrnas Unedig yr oedd ei angen ar Gymru - ar adeg yr adolygiad gwariant diwethaf yn 2021.

Pan luniwyd ein cyllideb ar gyfer 2023-24, defnyddiwyd yr holl adnoddau sydd ar gael i ni i ddiogelu gwasanaethau rheng flaen a darparu cymorth costau byw wedi'i dargedu i unigolion a'r economi.

Ar hyn o bryd, mae Gweinidogion yn gorfod gwneud penderfyniadau anodd iawn i sicrhau bod modd i ni gadw deupen llinyn ynghyd ac i'n hatal rhag mynd y tu hwnt i'n terfynau o ran gwariant, wrth geisio sicrhau hefyd ein bod yn anrhydeddu ein holl ymrwymadau cyfreithiol, gan gynnwys cytundebau cyflog i athrawon a staff y GIG.

Fe wyddwch am y datganiad ysgrifenedig a gyhoeddwyd gan y Prif Weinidog, Mark Drakeford ym mis Awst, a oedd yn trafod y pwysau sylweddol sy'n wynebu Llywodraeth Cymru ar hyn o bryd. Oherwydd hynny, nid ydym mewn sefyllfa ar hyn o bryd i allu cadarnhau unrhyw ddatblygiadau newydd ym maes gofal plant a sut y byddwn yn rhoi cymorth i deuluoedd ymdopi â chostau gofal plant yn y dyfodol.

Yn gywir,



**Julie Morgan AS/MS**

Y Dirprwy Weinidog Gwasanaethau Cymdeithasol  
Deputy Minister for Social Services